

Powšitkowne WOZJEWJENJA

jutrońčku, 21 apryla 2019

Časowy přehlad křižerskich procesionow

Přehlad časow křižerskich procesionow kaž tež čara, po kotrejž tam a dom pojedhaja, je na internetowej stronje www.posol.de pod „Časy křižerskich procesionow“ podaty. Přehlad je serbsce a němsce zestajany.

Křižerjo a zawěšćenje

Nastupajo zawěšćenje kołowokoło křižerjow je přinošk, kotryž je Katolski Posol k tomu před třomi lěta wozejwił, dale aktualnje pod www.posol.de (tam pod „křižerjo a zawěšćenje“) přistupny. Deleka na tutej stronje je link na tekst w němskej rěči podaty, zdobom pod němskej stronu www.posol.de/deutsch a tam pod „Osterreiter und Versicherung“.

Wustajeńca wo nałožkach w Serbskim muzeju

W Budyskim Serbskim muzeju móža sej zajimcy hač do njedźele, 5. meje, wustajeńcu wo serbskich nałožkach w póstnym a jutrownym času wobhladać. Džěći móža ju ze zmysłami dožiwić a so we walkowanju wuspytać a jutrowne jejka debić.

Wohnjowi wobornicy do Róžanta

Džakna Boža mša wohnjowych wobornikow ze Zarjadniskeho zwjazka „Při Klóšterskej wodze“ budže na předwječoru swjedenja swjateho Floriana, pjatk, 3. meje, w 19 hodž. w hnadownej cyrkwi w Róžeńće. Wšitcy wobornicy kaž tež hosćo su k tomu přeprošeni.

Požohnowanje motorskich

Popołdno z požohnowanjom motorskich zahaji so njedźelu, 5. meje, w 14 hodž. z nyšporom w Rabličanskej cyrkwi. Přizamknje so zhromadny wulět, kotryž wuklinči něhdže w 16.30 hodž. w Nowoslicach.

Mejski nyšpor w Róžeńće

Na našim hnadownym městnje w Róžeńće sławmy a prošmy mać Božu wo zastupnu próstwu pola jeje syna Jězu Chrysta za naš lud a kraj: zo bychmy dale žiwje wěрили do zrowastanjeneho Chrystusa. Do pačerja chcemy tež wšu swětowu cyrkej zapřijeć a so wo měr na zemi modlić. W tutym zmysle přeprošuju w mjenje Towarstwa Cyrila a Metoda z.t. (TCM) wěriwych ze wšitkich wosadow njedźelu, 5. meje, w 17.00 hodž. na wosebity mejski nyšpor do hnadowneje cyrkwe w Róžeńće. Muski chór Delany jón hudźbnje wobrubu.

Jurij Špitank, předsyda TCM

Wulět samostejacych

Wulět samostejacych ze serbskich wosadow budže wutoru, 21. meje, a powjedže do Noweje Cale. Zajimcy njech so hač do srjedy, 8. meje, w redakciji Katolskeho Posola přizjewja, telefonowe čisło (0 35 91) 55 02 12. Časy wotjězda busa z jednotlivych wosow so njedźelu do wulěta w Posole wozejwja.

Program k projektej „Swětło pozbudža“

We wobłuku wuměłstwoweho projekta „Swětło pozbudža“ swjeći so tutu njedzelu, jutrowničku, 21. apryla, na Tuchorskim kěrchowje rano w 6.00 hodź. nyšpor k zrowastanjenju. Při cyrkwi Našeje lubeje knjenje wužohnuja so w 10.45 hodź. křižerjo. Jich wočakuja zaso něhdže w 16.00 hodź. při tachantskej cyrkwi.

W tachantskej cyrkwi poskići so jutrońčku w 17.00 hodź. pišćelowy koncert z twórbami Johanna Sebastiana Bacha, Maxa Regera a Charlesa-Marije Widora. Hrać budže cyrkwinski hudźbny direktor Michael Vetter.

K temje „Smjerc a zrowastanjenje“ přednošuje emertowany profesor Ottmar Fuchs z Tübingena pjatk, 26. apryla, w Tuchorskej cyrkwi. Džeń pozdžišo, sobotu, 27. apryla, w 17 hodź. zarjadyje dujerska skupina Bautz'ner Stadtpfeifer w tachantskej cyrkwi koncert duchowneje hudźby. Cyłkowy program projekta „Swětło pozbudža“ je w interneće pod www.posol.de wozjewjeny.

GiG-festiwal

W Róžeńće wotměje so lětsa znowa Gig-festiwal – a to wot pjatka do njedzele, 26. do 28. julija. Nadrobny program so sčasom wozjewi. Tola hižo nětko su wšitcy wutrobnje do Różanta přeprašeni.

TCM hromadži za Malawi

Hladajo na scěhi tropoweho wichora Idai, kotrehož dla su hoberske kónčiny afriskich krajow Mosambik, Malawi a Simbabwe powodžene, chce Towarstwo Cyrila a Metoda z.t. (TCM) ze swojej akciju „Łužica pomha“ woporam pomhać a prosy za nich wo pjenježne dary. Zwisk do Malawija nawjaza wone přez Christinu Smolinu ze Swinjarnje. Wona je wot 2012 do 2013 a spočatk lěta 2017 w Malawiju jako wučerka a baba skutkowała, tehdy hišće jako rodžena Pólkec z Kulowa. Wona wudžeržuje k rjadnicam dale zwisk. Wone chcedža dary z Łužicy njeposrědnje biskopej dale sposrědkować, zo by je wón potrebnym rozdžělił. Štóž chcył wurjadnu akciju podpěrać, njech přepokaza swój dar na konto towarstwa pola banki LIGA: Cyrill-Methodius-Verein e.V., IBAN: DE 65 750 90 300 000 828 23 66, hesło: Malawi.